

**Milazim KRASNIQI**

# **LULJA E SHPËTIMIT**

Poezi



## **POEZIA MË NDIHMOI QË TË KONSUMOJA ILUZIONET**

I nderuari Adnan,

Botimi në këtë vëllim i poezisë sime të plotë, sipas seleksionimit që kam bërë vetë dhe sipas formës përfundimtare që u kam dhënë këtyre poezive, më jep një kënaqësi të veçantë, si kënaqësia që ka secili njeri kur e përfundon një punë të mundimshme e të gjatë.

Poezia ime që botohet në këtë vëllim, është finalizimi i tërë një projekti estetik që kam pasur si poet për më shumë se tridhjetë vjet.

Korrigjimet që kam bërë në shumë poezi, janë rezultat logjik i ndryshimit të koncepteve të mia estetike, fetare dhe jetësore, në udhën e vështirë të kërkimit të së vërtetës dhe të kuptimit të jetës sonë njerëzore.

Tash e di se e kam gjetur udhën e vërtetë, e cila më mundëson vetërealizimin si njeri në këtë botë dhe shpresoj edhe shpëtimin në botën tjetër.

Kërkimi im i gjatë poetik dhe jetësor, shumë herë ka qenë si i përhapshëm, kaotik dhe plot vuajtje, e kjo ka ardhur si pasojë e faktit se nuk e pata zbuluar me kohë të Vërtetën.

I jam mirënjohës poezisë sime, e cila më ndihmoi që të konsumoja iluzionet dhe të gjendesha në një truall, ku zgjedhja në mes të humbjes dhe shpëtimit, nuk ishte më e vështirë.

Dhe më duket se në poezi më nuk kam çka të them.

Kjo është forma përfundimtare e poezisë sime, të cilën do të dëshiroa ta kisha si një lutje të përhershme për veten time dhe për të gjithë njerëzit.

Lutem që edhe fjala poetike të jetë në shërbim të afrimit tonë me Krijuesin tonë.

Vetëm poezia që është e shkruar me idenë që të jetë adhurim ndaj Allahut dhe falënderim ndaj Tij, për të mirat me të cilat na e ka mundësuar dhe zbukuruar ekzistencën në këtë botë, është e denjë që të ribotohet.

Në Prishtinë,  
1 nëntor 2004

Me respekt,  
Milazim Krasniqi

IMAZHI GRI

## KRONIKË

Këto gjurmime i bënë  
do arkeologë të egër

Të tyret janë shifrat  
mbishkrimet  
edhe ato që s'tuhen

Thonë kanë thënë të urtët  
thonë kanë thënë të marrët

Dikujt duhet zënë besë  
Me sytë mes rrënojash,  
Kur harron besën e vërtetë

## DETI

Det o det det o gjëmë e kaltër  
këlthitur nga ëndrrime të mëdha

Të shikoj si fërgëllohesh  
dhe njësohem me dallgët e shqetësimeve të tua  
që vijnë nga ora qiellore që mat kohën tonë  
Mbi kokat tona

Edhe në ty e shoh mrekullinë e krijimit  
Të qiejve e të tokës  
Dhe të jetës sonë  
Të cilës Krijuesi i tha: “Bëhu” dhe ajo u bë  
Që t’i jep kuptim mrekullisë  
Përmes adhurimit

## NATA E QIRAVE

Sonte kanë zbritur në kulmin e shtëpisë  
shpirtrat e engjëjt

Ne s'i shohim dot me sy

Sonte kanë ardhur shpirtrat e engjëjt  
për të na dashur o gjykuar

Lehtë ia bëjmë me këto të mira në sofër  
Po si t'ia bëjmë  
me varfërinë e shpirtit



## GURI I MEGJËS

Bën po atë gjumë guror  
Të shekujve të fjetur

Në faqen e tij të rrahur nga era e shirat  
si në një skenë filmi të tmerrit  
zgërdhihet nofull' e vdekjes

Qëndron në një bucë të rëndomtë dheu  
Po njerëzit ia bartin peshën në zemër  
Që kur humbën paqen në shpirt

## DASMË

Ja po vijnë dasmorët po vijnë  
shtegmalit e breglunit gjithkrah  
të gjithë të buzëqeshur

Në oborr është ndezur zjarri  
për busull e mirëseardhje  
edhe atyre që s'janë të ftuar

Porta është sofër për të gjithë  
gëzimi daulle e të gjithëve  
një shtëpi kalamaj miq uroni  
Dhe dritë në të gjitha anët  
Dritë që na shpëton nga humbja  
Nëpër udhëkryqet e lumturive  
Të rreme

IM ATË

Kur flitet për arat  
im atë luan nga vendi

Shikon qiellin  
sikur kërkon mendimet në re

Palon duart e çara  
si për bekimin e fëmijëve

Në atë dramë të tij  
diçka gjithmonë mbetet e paparë  
diçka gjithmonë mbetet e pathënë

Kur flitet për arat  
në shpirtin e tim eti  
Mëshira e të Mëshirshmit  
Ringjall besimin  
si shiu tokën e vdekur

## HIJA E TIM ETI

Dritarja kap një cop qiell  
të mugët si fytyrë gruaje me dhembjet e lindjes

Ka kohë që e vështroj këtë sfond të plumbtë  
gjelbër të shkyer nga degëmollët  
e të qepur etshëm nga pipëtimi e gjetheve

Në këtë soditje të qetë  
papandehur më shfaqet porteti i tim eti  
me atë shqetësimin e përjetshëm  
që lidhte tokë e qiej

Dhe m' i shpalon vrragët e duarve e të buzëve  
të ashpra e të thella si të tokës  
sa unë vërtet s' mund ta di  
i mori ai të tokës apo toka të tij

Im atë i mirë im atë i etshëm  
ende endet hije arave duke u lutur  
për diell shi e bukë  
Dhe paqe në shpirt

Tash nga gjethet po bien pikat e para të shiut  
të kthjellëta si lot gëzimi  
Të dikujt që kthehet përgjithmonë  
Nga mërgimi

## DITA E TREGUT

Zbresin burrat nga malet  
me zemile e thasë  
me mushka e kuaj

Qyteti është i tyre këtë ditë  
me sheshe me kafene me kënde  
pale a ua zë të gjithat që kanë e s'kanë

Në vend e kohë të caktuar  
takohen miq e myshterinj  
dredhin fjalë e cigare

Dikush shet lopën dikush  
blen robe për nuset

Kur ia lidhin kërthizën  
ditës së tyre të shënuar  
marrin udhët kah malet  
me veten e tyre për t'u ritakuar

## PASDITE ME SHI

Nisën të bien pikat e para të shiut  
era i hedh tutje me tërbim

Lagjja ka rënë në një gjumë klinik  
rrugët prehen si të sëmurët në komë të thellë

Gjithë pamja që kap syri nëpër xham është  
e akullt  
si përfytyrimi i hedonistit për vdekjen  
Që edhe mund të vdes pa e kuptuar  
Se kjo është vërtet mëshira e premtuar

## NJËQIND VJET VETMI

Kot po i sjell numrat  
thirrjet i përbin nata

Bota ka rënë në gjumë  
Ora e murit bën grevë

Ç'të bëj nëse duhen bërë  
flijime më të mëdha se vetvetja

Të hesht edhe unë si muret  
të kotem me saksitë

Si t'i shpëtoj vetmisë  
që më mbulon me harrim

E dhoma që lëngon e bota që fle  
të ma bëjnë një vdekje më njerëzore

Ah  
Vetmia qenka brendas vetes  
Kur humbim lidhjen me Shpërblyesin

Dhe unë qenkam vetë prodhuesi i saj  
Si merimanga  
kur pa dashje kurthohet në rrjet

## ËNDËRR

Përtej muzgut bie briri  
në pluhurin e përfytyrimit gjurmë  
mamutësh kryqesh avionësh

Gjymtyrët fluturojnë nëpër qiell  
duke ndjekur gjahun

E në boshësinë e akullt pastaj  
fëmijë epruvetash luajnë me baltë

“prerja e artë” me thikë  
pikturon bukurinë e verdhë të murtajës

Dil prej kësaj ëndrre me ngut  
Nëpër portën e hapur nga engjëjt

Ajo të rikthen në sprovën fitimtare  
Kur me zemër zgjohesh



## BALADË TROTUARESH

Me delikatesë bie mbrëmja  
siç bie perdja e kadifenjtë  
pas një akti të kryer në dramë

Ndanë rrugëve ndizen neonët  
në farfurinë e dritave të tyre  
Qyteti merr frymë si astmatik

Nëpër markete kafene librari  
hyjnë e dalin njerëz  
për të marrë a lënë shqetësimet e veta

Në të gjitha anët njerëzit nxitojnë  
dhe çuditërisht u ngjajnë pantomistëve  
të harruar në rolet e tyre

E gjitha kjo gjallëri është rrenë e fantazisë  
Nëse nata nuk përqafohet në paqe  
Si jastëku i butë  
Ku pushojnë edhe ëndrrat

## METROPOLI

Ku ta hedhësh hapin do të shkelësh  
në gjethe të verdha e fjalë të rreme

Kah ta kthesh kokën do të shohësh  
reklama verbuese e fytyra të ngrira

Ç'të zë veshi do të dëgjosh  
zhurmë motorësh e rrëfime triviale

Ik kah të ikësh do të shkosh  
drejt vdekjes nën rrotat e mitit modern  
I cili pikë faji nuk të ka

## ANTIPOEZIA

Sot pasdite në shitoren “Gërmia”  
kam parë poetin. Më të famshmin poet

Kish të veshur seksi-pallto. Farmerka Texas  
e këmishë brilantini. Një minikravatë e  
borsalino kauboji. Këmbëzbathur.

Buzëqeshte. Përshtëndeste me duart plastike.  
Shkëlqente nga dritat shumëngjyrëshe  
Të vitrinës

Dhe derisa e shikoja atë të ngrirë  
dhe njerëzit kundruall tij të ngrirë  
më bëhej se e ndieja të recitonte  
një antipoezi pa fund  
me zërin joshës të reklamës

## IKJE NGA VETJA

Në peizazhin e mëngjesit pranveror  
buzëgazi i diellit tjerr ëndrra të arta

Nëpër degët e drunjve cicërojnë zogjtë  
e gjethet ua mbajnë ison me pipëtimë

Këtu gjithçka i ngjan përrallës sonë  
që e shpikim në një gotë me zhgënjimin  
e pluhurosur

Por ç'm'u desh ky uikend  
edhe jashtë vetes ta njollosojë simetrinë

Se tymtarët automjetet bërllugu  
gojëhapur më presin t'u kthehem në mbrëmje  
sërish

Duke shtrydhur nostalgjinë në këtë oazë  
ndiej turpin e ikjes nga vetja

## GJUETI NË SHTRIGA

Ngrihet siç ngrihet tufani  
fjalë e thënë në erë

E përlan para vetes  
të veja virgjëresha

Ua bën gjykimin  
në kamarën e dhunimit

Në kokën e botës metastazë  
E liga  
Pse e bëtë jetën një gjueti  
Në shtriga

Zotëri Torvemada  
Inkuizitor i madh  
I krimit

## SODITJE

Copëdielli si pyll në flakë  
fundoset duke lënë pas qefinin gri

Kurorat e rrezeve jermërisht  
rikrijojnë përpëlitjen e tyre në xham

Fëmijërisht sodis këtë pamje  
si këtu e dhjetë vjet më parë

Po ai perëndim dielli  
por tjetër skenë në soditjen time

Kam zënë ta kuptoj mrekullinë

## MUZGU

Si ushtimë pylli përhapet kumbimi  
i trokut çalaman të pelës së zezë

Ajo turfullon e hakërrohet  
me vringëllimë patkonjsh fik qirinjtë e dritës

Nga pamja e mugët tulaten njerëz e bimë  
vetëm lakuriq farkëtohen vitheve të saj

Ninulla e natës na merr gjithëve në dorëzim

## PAGJUMËSI

Orenditë konten  
si korifenj të gozhduar  
Në misionin e tyre të kotë

Ndez transistorin  
Tinguj të një muzike të vrazhdë  
shpërthejnë si gaz i nëndheshëm

Jashtë fryn  
Pikat e shiut dimëror  
përplasen xhamave me tërbim

Kujtoj mikun  
nisjen e tij në udhë të largët  
e kthimin në sarkofag bojëkafe

Tik-taku vazhdon  
Akrepat kryqëzohen ashpër  
Si brirë mamutësh

Një mjegull klinike shtrihet  
si pauzë midis aktesh  
Është gjumi që bie si vesë qumështore  
Nga dora e përjetshme e mëshirës



## VJESHTA

Më në fund erdhi  
e zyrtë flokëshprishur  
si një mërgimtare e shumëvuajtur

Dhe po shkel arave trotuareve  
rëndë duke derdhur vrerin  
që i është lidhur në grykë

Vjeshta do të mërgojë sërish  
bashkë me pikëllimin e saj të përjetshëm  
Ndërsa tonin na e lë pykë në grykë

DIMËR

Peizash me një ngjyrë të vetme

Bardhësia rrëqethëse shtrihet

Boshësisë së saj vërshtëllen era zemrake

Duke shkelur mbi borën këlthitëse

Provoj t'i gjej kësaj dite një copë vend

Në galerinë e gjërave të harruara

## GURGDHENDËSI

E bart gurin në krah  
pastaj net e ditë e vjet  
mundohet të zbërthejë enigmën e fjetur

Duke u thelluar në të me daltë e çekan  
shpalos si faqet e një libri enigmën e jetës

Gurgdhendës është më i rëndë guri  
a dhembja që skalit në të

Më mirë lëre punën që s'është jotja  
Dhe kthehu paqësor në enigmën tënde njerëzore

## UJËVARA

Nga gurmazi nxjerr një rënkim të mbytur

E kreshpërohet me tërë egërsinë  
gjymtyrët e veta kafshon nga tërbimi

Po atë gjëmim ndiej  
sa herë mbyllen në një ëndërr të keqe  
Nëse nuk e gjej si duhet derën e daljes

## ARKITEKTI

Ja këtu do të ngrihet lagjja e re  
ky kompleks përrallor  
që po më zhurmon në kokë

Lart do të jenë apartamentet  
poshtë marketet shitoret e lodrave libraritë  
përballë fusha e gjelbër dhe pishat

Lagjja duhet t'i ketë të gjitha  
ç'u duhet pleqve, punëtorëve, kalamajve  
Si ta nxjerr në përmasat e jetës  
Pa e shkelur kufirin e të vërtetës

**PIRG VEGIMI**

## MOTIV ARBËRESH

Fryn Vetëtin dhe Gjëmon  
Nga ky rrëmet llahtar  
Tundet edhe dridhet Dheu

Mot i lig i tërbuar  
Si në baladën shumë të lashtë  
Edhe gurët vendit shkul

Rrokullisen tatëpjetë gurët  
Edhe gjenden mu në majë  
Të thepisur si mallkimi

## NËNAT

Nisen pas yjve djemtë  
E nënat mallpërgjëruarat  
Ngrohen me shkarpa ëndrrash

Mësyjnë tek bien boritë djemtë  
E nënat shpirtpërvëlueat  
E shkojnë jetën tek portat

Mbesin fushëtirave djemtë  
E nënat shamizezat  
Varret në zemra ua mbajnë

Po s'u luten si luten nënat  
Për shpëtimin e përjetshëm



## SERGJENET

Gjithë ajo pasuri oh ç'pasuri  
As në tokë as në qiell

Ftoi nga kushedi ç'vjeshtë  
Molla e një vere që s'e prek harrimi

Shamia që dikur valles i printe  
Zogu në dru gdhendur gjithë vegime

Gjethe të thara të blirit erëmirë  
Letra të vulosura me shkretëtirë

Gjithë ajo pasuri oh ç'pasuri  
Syrin të kurrkujt s'i fshehej

Muzeume malli qenë përherë  
Sall shpirti mund t'i mbante ashtu në erë

SOFRA

Shtrohej në ballë të vatrës  
Re vegimi hënë e plotë

Buka u thehej të gjithëve  
Edhe atyre që mungonin ngahera

Mikun në bukë s'e në prente  
Edhe mik po të mos ishte

Edhe m'e rëndë ish kur çohet  
Hark shprese diell i ngrirë

Ndrydhej shtrydhej veten e hante  
Frymën gjallë të na e mbante

## NË SHPELLËN E MERMERTË

Nëpër një portëz  
Të cilën na e hap vetë ciceroni  
Hyjmë në Shpellën e Mermertë

Tek ecim si të shkelnim nëpër habinë tonë  
Hapat gjëmojnë bubullimë  
Ndër muzgje vere të vonë

Ciceroni përmendsh si përçart flet  
Për do speleologë temperaturën në shpellë  
Për të panjohurën që pret

Mijëvjeçarët sipër kokash të gurëzuar  
Flokët sa s'na i përkëdhelin  
Si prindërit fëmijëve të llastuar

Po prapëseprapë veten e përmbajnë  
Në atë gurëzim madhështor  
Lotët veçse s'mund i mbajnë

Ndërsa ne vërtet asgjë nuk kuptojmë  
Përderi nuk e masim kohën  
Ashtu si Krijuesi e ka krijuar

## PËLLUMBAT

Imazh rrënoqethës krijojnë  
Tek hyjnë në guvë syakuj  
Tek dalin

Ajo vërtitje përmbi kulme  
Ankth që bebzën rrit

Sado ulokë që të jenë  
Qiellin e çukasin në rrashtë

Tek fluturojnë nëpër shqotë  
Tek çojnë në vend fshehtësinë

Flatrat plumb u rëndojnë  
Nga kuje netve me hënë

Ankth që bebzën rrit  
Ajo vërtitje përmbi kulme  
O nënë

## ILION

Të mbuluan kohët me lava hires  
Të mbuluan me mollokë gënjeshtresh

Para shkëlqimit dhe mjerimit tënd  
Fjalës i ngatërrohet gjuha ndër dhëmbë

Të mbuluan kohët e ikën kokëpërgjakura  
Të harruan kohët e t'u kthyen zemërplatura

Në zjarret që të shkrumbuan s'u dogj liria  
Se kish humbur më parë  
Në mjegullat kobsjellëse të miteve

Atë ditë e sot  
Kornizë për portret s'të gjen historia

## KURTHI

U nis në sa e sa luftëra  
Veten duke bërë fli

Nuk qe Helena e bukur si thonë  
Po bota e shëmtuar ish

E ra dhe Ilioni së fundi  
Pus i thellë në atë rrugë

Po kurthit të ngrehur  
S'i shpëtoi as Agamemnoni

Zgjidhte një zemërimi Klitemnestra  
Jo  
Mirrte hak Ilioni

## THEMBRA E AKILIT

E çka po të mos ktheje në betejë

Nëpër qiellin gri të antikës  
Imazhe mitesh më pak do të kish

Po thembra jote do t'i bënte bisht harrimit  
Kohën tonë çaltas do ta arrinte

E çka po të mos ktheje në betejë

Mallkimi që ti e barte në thembër  
Atyre që harruan besën e dhënë  
Edhe ashtu do t'u rëndonte në zemër

AVE CAESAR

Ave Caesar

Saç i zjarhtë mbi Dhe kurorë

Ëndrrash në mes të këputura

Ave Caesar

Edhe kur përfytem me luanin

E tërbimit tend të madh

Gjaku im qiellin kur spërkatë

Ave Caesar

Edhe kur i fundmi kuadër i jetës

Ndër bebëza më ngrihet

Me dhe kur të më mbulojnë

Ave Caesar

Që vdekjes sime i duartroket

Për tënden unë dhe do të bëhem

Dhe që në gji do të të merr

Deri në ferr



## RËNIA E KARTAGJENËS

Thonë ra Kartagjena  
Se qe strateg Scipioni

Thonë ra Kartagjena  
Mbi hirin e saj të stërngritej Roma

Po Kartagjena s'kish si të mos binte  
Përderisa hijes së vet  
Dronë si një fantazme ia kishte

## ARRËZA

Cingërima e orës më nxori a më mbërtheu në  
pezhishkën e asaj ëndrre llahtarinë e të cilës mendja  
s'mund e peshon  
Diçka si recital robotësh diçka si kor shurdhmemecësh  
Pastaj më zuri një kollë gulçitëse një ngulfame  
përmbytëse  
E ndeza cigaren e thitha një here thellë dy tri herë  
Fërkova sytë hundët theva gishtrinjte kafshova thonjtë  
krova flokët  
Barkzbrazët dola në rrugë shpirtzbrazët  
Mure Balkone Shtylla Kartmortale Asfalte Shitore  
kafëçajtore  
Kalimtarë Kalimtarë Kalimtarë Kalimtarë Kalimtarë  
Thithin cigare përtpin çamçakëz pështyjnë reklamat  
shikojnë  
Njerëz-gjymtyrë Njerëz-gjeste Njerëz-hije  
Rruga i ngjet një skene teatri eksperimental  
Ku përdhunshëm reprizohet një shfaqje pantomime  
Zgjat shfaqja apo aktorët janë harruar në role të tyre  
Si na u fry kështu Arrëza si na u bë digë që ndal fjalët  
E si vetmia vërshëllen nga të katër anët si veri vjeshte  
të vonë  
E na ther në shpirt për një humbje që i bëmë vetes  
E një hidhërim që i bëmë Krijuesit

## DIQYSH

Diqysh dolëm në qytet  
Gruaja e unë me të shtatë fëmijët

Diqysh ecja aq serbes  
Sa mezi e njihja veten

Te Sheshi i Fitores u ndamë  
Secili të shkonte nga t'ia kishte ëndja

Unë bleva krejt ç'më duhej  
Pixhame këpucë këmishë

Siç qemë marrë vesh  
Te Sheshi i Fitores u takuam sërish

Të gjithë kishin blerë gjithçka  
Sa mua më hante diqysh një brengë

Gjithë ato gjëra që na mungonin  
Shtëpia si do të na i zinte  
Ëndrra kur të më ikte

## ROKENROLI

E desha sa më të dashurën vashë  
Të ëndrrave të hershme djaloshare  
Me të cilat përthekojë botën e madhe

Kish në të diçka farfuritëse  
Që tinëzisht të rrëmbente të pushtonte  
Dheun nën këmbë ta gërmonte

Po babait prapë i mjegullohej syri  
Tek dëgjonte këngën për Isa Boletinin  
Për të cilin të gjallë e ruante kujtimin

E nëna më kallëzonte deri vonë  
Për dajë Rexhepin partizan  
Që në frontin e Sremit kishte rënë

Dhe a mund ta bëje veshin shurdhër  
Para tundimesh që të thërritnin  
A mund t'i këmbëja me Elvis Prislin

E desha vërtet rokenrolin  
Si një lodër të posablerë fëmija  
Po për të unë kurrë s'do të jipja  
As baltën e opingave të mia

## IM BIR

Shtlatin ia shtroj nga pupla përrallash  
Një fjalë peng i vë përkresë  
Zhurmën e rrugës ninullë e ka

Të matet në diell me trimërinë  
Si enigmën e lodrave ta peshojë pamundësinë

Gjumi ia zë një hutim në fytyrë  
Dorën mbi një lodër që s'i zihet besë

Në ag tek nxitojmë drejt stacionit  
Matet me enigmat e ëndrrave të veta  
Si koha me hije  
Në ka pasur kohë të ëndërrojë

## PIRG VEGIMI

Shumëherë kur s'mund ta shkruash  
Asnjë varg për be  
Je poet i madh  
Pirg vegimi je

Mëkati për arrëz të lidhet  
Fjalën ta dhunon

Ti kujton ae i ditë gjitha  
Të Bukurës së Dheut s'ii rri kobi mbi kokë  
Sytë e Homerit pse s'e kanë një lot

Danteja me ferrin pse përfytet kot  
Serembeja përse shëtiti i humbur nëpër botë

I ke parë me sytë e tu të gjitha shumëherë  
Po a e kuptuar s'e nga u vjen humbja  
Atyre që harrojnë veten përherë

## **QESHJE SARDONIKE**

LISI

Nëpër ninëzat vagëllore  
Lisit sa i duket kurora  
Ai peizazh illyrizor

Përeth tij tri pelida  
Syverbuara gjuhëshkurtuara  
Sillen dhe gjithë drithërimë  
Nga një pëllumb e mbajnë në duar

Kur i lëshojnë në dritë të qiellit  
Shkulin flokët nga trishtimi

Lis Dodone rrënjënxirë  
Maja Motër do të rrafshohet  
Mu si varret nëpër mote

Po prapë dielli do të lindë  
Zemra do të vetëtijë  
Moj Dodonë harresa jonë



## ENIGMË

Me të marrë lajmin e fitores  
Pupthi kërceu nga froni  
Mbret Agroni

Nga gëzimi i pritur  
E tundi një e qeshur me zë të lartë  
Sa as vetë s'dinte nga i dilte

Qeshën pas tij me radhë  
Teuta që mbante Pinin në prehër  
Kasnecë këshilltarë e truproje

Mbreti shtroi një gosti të madhe  
Pëllumbat pa i vështruar  
Edhe më keq akoma  
Zotin pa e besuar

Dhe nuk e zuri pije e fortë  
Librat si na e rrëfejnë  
Se mos iu zu tharmi enigmës mbretërore  
Në Shën Helenë

## KUVADA E BRAKTISUR

Si bisha i unguronin Demetrit në zemër  
Lakmia dhe trimëria

Detit ia njihte sëmundjen  
Po tokës ia harronte dashurinë

Mbi shpatullat e Fulvit  
Me thonj të skuqur prekte retë

Mbi shpinë të Postumit  
Kafshonte mishin e trupit të vet

Kur deshi këmba dhe që t'i zinte  
Në hundebuzë u rrëzua

Kohë i mbeti tepër sa ta kuptonte  
Se ku kishte zënë në thua

## MONEDHA E GENTIT

Në njërën anë shungullon nga deti  
Në tjetrën ulërin nga mali

Im gjysh dinte ç' duhej të zgjidhte  
Midis Peshkaqenit e Luanit

Rrugë të mesme s'ka thoshte gjyshi  
Kur të t'i nxjerrin për fushë rropullitë

Ndoshta do ta rrafshoj Kuirinin  
Ndoshta do ta rrafshoj Kuirinin

Do ta bëj ndoshta vdekjen në arenë  
E të mbetem për jetë të jetëve pa varr

Oh varri im është tmerrsisht i thellë  
Sytë nuk më shohin kund të tillë humnerë

Në njërën anë i shungullon nga deti  
Në tjetrën i ulërin nga mali

## GURËHEDHËS ILIR

Guri që është durim i moçëm  
Mund të rrokulliset nga maja  
Nga dora jote

Augustit plaga ende i kullon  
Dhe tërbimi i gurit e zë në revan

Tek ushtojnë lugjet kushtimi  
Me shekuj në zemër i ther

Fantazma famë e tij kundron e hutuar  
Deri sa i përzihen thembra e gishtërinj

Guri është durim i moçëm  
Dhe rrokulliset nga maja  
E lirisë së dhunuar

## GJUMI I MESDITËS

Ta kesh zogun në dorë  
E ta merrësh botën në sy

Të ikësh larg e më larg  
Nga zëri yt  
Që gjegj kur thërret

Thell të fshihesh  
Në zgavrat e vetmisë  
Që t'i bësh ballë shkohëzimit

Të ëndërrosh pastaj  
Derisa të verbohesh  
Me kokën tënde në duar

E sheh si zgjat zgjimi  
Më shumë nga jeta  
Popull i mashtruar

## MBRESË UDHËTIMI

Gjithë ditën e lume pi kafe ekspres  
Në të djathtë e në të majtë  
Pluhur reklamash përdridhet  
Nëpër sy më vret pagjumësia  
Aq më bën  
Kohën nuk e mat në akrepat e tyre  
Po të kultereve të mia

Në këtë ankandqytet  
Të hapur për të gjithë në çdo kohë  
S'mund të blihet me çmimin fillestar  
As dhe një kontinent as dhe një gjilpërë  
Roje bën Liria  
Me Portën Triumfale si gërshtë

Gjithë natën e lume pi kafe ekspres  
Në të djathtë e në të majtë  
Metro koridore katakombe moderne  
Gërmojnë thellë rrënjët e lisit  
Vras mendjen  
Me ç'litar mund t'u matet perimetri  
Mashtromeve të Parisit

## UDHËT E LARGËTA

Profesori në vendin e vet  
Matej e çmatej  
Me fjalët e veta

Salla sikur ngushtohej  
Lapsat me gulçim  
Zbraznin pikëllimin e ngjyrës

Mureve përplasej kumbimi  
I ndonjë thirrjeje në mal  
Iso i mbanin dallgët e detit

Murgjit rendnin të shqetësuar  
Gjurmët u mbulonte shkrumbi  
Hapin me të hedhur

Freskat heje akulli  
Pikonin në hapësirë  
Kujtimin

Po të gjithat nuk ia dilnin  
Që humnerës deri te Buzuku  
Urë t'i ngritnin

Ishte një harrim që shtrihej nëpër shekuj  
Dhe zvarritej si memec  
Pa nxjerrë një fjalë

Si e kishte harruar veten mbi hone mohimi  
I magjepsur nga mitet e mashtrimet  
Njeriu shqiptar

E kur mbaronte ligjërata  
Salla merrte prapë formën e vet  
Po honet e mohimit rrinin pezull  
Edhe në ëndrra na vinin pas udhëve të largëta



## MUNGESA PARA NESH

Para nesh s' ishte Numri  
As matej hapësira  
Nëpër nyja gishtërinjsh

Para nesh s' ishte Uji  
As lundronte bota  
Varkë në bebëza

S' ishte para nesh as Zjarri  
Që mbush pritjen  
Shkëndija psherëtimash

S' ishte kurrkund Ajri  
I frymëmarrjeve të thella  
Që tundin yjtë

Gjithë ajo mungesë e madhe  
Deri sa e kuptuam  
Se ishim të krijuar për t'u dashur  
Nën këtë kurorë

## SYTHA TRËNDAFILASH

Në këtë buzëqeshje të fiksuar  
Një vere në det  
Herbarium dashurie shpalosur  
Rrudhëzat rreth sysh të rrinë

Tek t'i sodis plot mall  
Kujtimet si shtjellë më përlejnjë  
Lëmë pas ditë e muaj e vite  
Si drunj rrugësh për anë

Të kujtohet si bënim pizgrra  
Me gurë nëpër syprinë  
Si na arrinin valet të zemëruara  
Që ua venim në lojë kaltërsinë

Dhe tek të fiksoja në këtë kuadër  
Ndjeja po atë shqetësim  
Si në takimin tonë të parë

Kanë kaluar shumë vera të tjera  
Dhe fotografi të tjera bëmë  
Po rrudhëzat rreth sysh më s't'i zura  
Ashtu të çelura sytha trëndafilash

## SHKUMËSAT E PIKËLLIMIT

Peizazhi i paparashikuar

Në sytë tanë plastikë

Gurë e rrasa muronte e rrënonte

Muret e dinin

Si lartësohej pamundësia

Kur binte muzgu

Në sytë tanë regëtinte

Udhët e largëta na kujtonin

E ne si fëmijët në asfalt

Vizatonim kujtimet

Me shkumësa shumëngjyrësh

Pikëllimi

## HERBARIUMI FAMILJAR

Prindërit e kujdesshëm

S'e harrojnë detyrën

Në ditët e shënuara

Fëmijës i blejnë

Veturë kafshë shtëpiake

Avion supersonik plastik

Në shitoren e parë të lodrave

E puthin në njërën faqe

Ia ngrehin njërin vesh

Dhe secili mësyn

Ta zërë kohën e vet të humbur

Vetmevete thonë

Kjo është kohë e artë e fëmijës

Gjithë këto lodra që ka

Kuku për ta

FËMIJA MOLLA VETMIA  
Dridhet fëmija nga mendimi  
Molla kalbet në tryezë  
Lodrat s'dinë për zgjim e lojë

Plagë të thellë merr shkëlqimi  
Tek mjaullin vetmi e zezë  
Atë që humb si ta fitojë

ARIU

Më të thellin pyll e ka shtëpi

Më të zezen shpellë e ka liri

Mijëvjeçarë të tërë atje lë gjurmët

Kurthe për shira të vjeshtës

Veç kur i ungurojnë rropullitë e sos me një

Ariu i Bardhë Ariu i Murrme Ariu i Zi

Po s'mund të matet kurrë me faraonin

As me Neronin as Napoleonin

As me Hitlerin as me Leninin

As Musolinit as me Stalinin

Dhe as Xhingiskanin as Sllobodanin

Pleqërojeni edhe vetë njerëz të mirë

A është sa e pandehim ariu egërsirë

## VAJI I FËMIJËS

Sot gjithë ditën e lume  
Koka më mbeti në gazetë

Nga shtylla në shtyllë nga faqja në faqe  
Bota më shndërrohej në rebus

Kronika e zezë sa s'më la pa mend  
Rropullitë m'i gërreu raporti për vërshimet

Kumtesa për Inkët e Atlantidës  
Në rrjetë merimange m'i vari mendimet

Shiu s'prajti as ende ka pushuar  
Si ta vajtonte qielli verën e harruar

Teuta s'm'u hoq kurrë nga prehëri  
Po as vajin macja e vogël nuk e mejti

Gjuante kukullën përplaste këmbët  
Më shikonte mes lotësh hutueshëm e shkreta

Si nuk më bënte zemra dhe mua  
Ta nxirrja kokën nga gazeta

## TELEVIZORI

Butoni me shpejtësi kozmike  
Ia heq kataraktin nga bebëza  
Krejt botës

Përzihen pamjet humbin kuptimet  
Fjalët heje akulli  
Na varen buzëve

Dikush kap kokën dikush lëpihet  
Tjetri fërkon sytë  
Nga apatia

Butoni me shpejtësi kozmike  
Katarakt të ri në bebëz i shkakton  
Krejt botës

Po duhet të kalojnë disa orë drite  
Derisa të na shkrihen hejet e fjalëve  
Buzëve varur



## GAZETA

Tek lexoja në gazetë një ditë  
Një deklaratë për armatimin në gjithësi  
Përvajshëm fërkoja sytë

Njeriu nga fotografia shqyhej në gaz  
Si të kishte zbuluar papritmas  
Një enigmë të ndërlikuar

Faqet e gazetës nëpër duar më shushurin  
Fjalët nëpër reliefin e butë të letrës  
Si bishat në pyll ulërinin

Nuk dëshiroj të mirrem me hamendjen  
Kobin e Atlandidës njeri a e parashikoi  
Në fare deklarate në gazetë

## **FORMULA E KATONIT**

## MEDITIM PËR SAMIUN

Mote ka që trastë më rri  
Figura e Samiut në kujtesë

Dhe s'gjej kuadër që ta zërë  
Enciklopedinë e gjallë  
Që ndjehet ngushtë në dy shekuj  
Që me njërin sy e shikojnë

Dhe s'gjej kuadër që ta zërë  
Dilemën bjeshkë  
Gjuhën e pushtuesit si ta emërtosh  
Ndryshe  
Kur hijet vallëzojnë rreth shtëpisë

Se sytë zënë e djegin  
Se sytë zënë e lotojnë

E atij njërën faqe ia rrahin valet në Bosfor  
Tjetrën borërat në Alpe

Ka mote që ha veten e s'e di  
Ç'ka qenë  
Ç'është  
E ç'do të bëhet me Samiun  
Që ndan e bashkon dy kontinente  
Me tërë atë dhembje

## VIZA NË MES

Nëpër libra mësimi enciklopedi  
Nën emër futur në kllapa  
Si dy akrepa të ndalur  
Varur rrinë dy data

Zbritja s'bëhet lehtë  
Me matematikë të thatë  
Ajo vizë e shkurtër në mes  
Është udhë nëpër shtrëngatë

Fjalitë tutje zgjaten  
Me shqetësimet e kohës  
Po duken së tepërmi të ngatërruara  
Si diplomacitë e Evropës

Fotografia e zverdhur përbri  
Vjen disi e largët  
S'është faji i fotoapararit  
Që nuancat e shpirtit s'i kap

E datat e futura në kllapa  
Akrepa të ndalur rrinë  
Viza e shkurtër n'mes tyre  
Enigmë për historinë

## DRINI NË TREG

Sa herë shoh peshq të freskët  
Në hyrje të tregut  
Sikur i shoh mendimet e mia  
Të zëna me rrjeta  
Me zorrë përfushë  
Sikur i shoh kujtimet  
Dhe nis e më erret  
E marr në thua  
Djersë të ftohta më mbulojnë  
Mu në hyrje të tregut në Prishtinë

Duke ikur nga tregu  
Ndjej si gumëzhin në mua pikëllimi  
Si të buronte vetë Drini  
E mendimet më ngelin nëpër shporta  
Me zorrë për pluhur zvarriten kujtimet  
Sa kur arrij me gjysmë shpirti në shtëpi  
Fshihem nga pasqyra  
Sytë më kanë marr një pjesë shëmtie  
Nga hyrja e tregut e di

## FORMULA E KATONIT

Njëherë e një kohë

Njëfarë Marcus Porcius Katoni

Shpiku njëfarë formule

Të thjeshtë për Kartagjenën

“Ceterum censeo Carthaginam delendam  
esse”

Që s’e harronte ta shqiptonte

Në senat në shtëpi publike

Në pijetore në gjumë,

Në nevojto

Në kohën e tij

Psikanaliza s’kishte fenerë

Për bodrumet e shpirtit

Nga ajo formulë ndjellazezë

Erërat e pikëlluara

Përhapën hirin e Kartagjenës

Në të katër anët e botës

Duke brumëzuar gjak e ëndrra

Nëpër kujtesë

Atë ditë e sot

Formula e Katonit mbeti në fuqi

Nëpër kabinete laboratorë

Salla solemne akademi

Vë veto të plotë

Dhe Kartagjenat e trilluara

I ndjek nëpër botë

## MIDIS BASHKËFSHATARËVE

Pas kaq kohësh prapë jam midis bashkëfshatarëve  
Në ditën e shkollës

Me sy i vjedh burrat  
Që janë bërë grumbull në banga të fundit  
Si të qenë strehuar nga shiu

Kohë e mbjelljeve  
Po ata kanë ardhur të dëgjojnë vjersha  
T'u duartrokasim fëmijëve

Kështu vinte edhe im atë  
Kur recitoja vjersha në ditën e shkollës  
E gëzimi i stiste mustaqet

Prapë jam midis bashkëfshatarëve  
Dhe ndjej atë gëzim të largët të harruar  
Si një fjali që e lexojmë në dërrasë  
Të pafshirë nga ora e kaluar

## COPA METALI NËPËR GISHTËRINJ

Kthehem nga puna  
Pa një fije gëzimi  
Në shtëpi

Dreka e ngrirë  
Pasditë të gjatë më premtton

Futem nën batanije  
Dhe vështroj rebusët e merimangave

Zërat e fëmijëve ecjaket e gruas  
Si të qenë fshehur nën tapiceri

Numëroj ditët e mbetura  
Si ushtari i vjetër  
Copa metali më rëndojnë  
Nëpër gishtërinj

Dhe s'gjej fjalë t'u shpreh dashurinë  
Për sa m'i japin kuptim jetës  
Kur të vijnë



## THIRRMË

Posa cingëroi telefoni  
Hodha gazetën i lehtësuar  
Dhe pas fjalëve të para  
Njeriu filloi të më kërkonte ndjesë  
Si t'ma kishte kanosur jetën

Unë i thashë se më gëzoi ajo thirrme  
Po ai s'më zuri besë

Ishte dita e dytë vërtet  
Që s'më kishte kërkuar njeri

Dhe unë përfytyroja receptorë të ngritur  
Gishtërinj që formonin numrin tim  
Qoftë edhe gabimisht  
Po ec e mbushja mendjen atij

BUBULINA

Erdhi një natë tetori

Me vaj në buzë Bubulina

Ç'vaj

Me bubullimën e lashtë të jetës

Dhe hyri në albumin e jetës sonë

Ku vendi i vet e priste

Tash kaltëron Jonit të gëzimeve tona

Me emrin që kohët përtërin

ALBUM PËRMALLIMI  
Shkrepi muzgu fyshekzare  
Tym e plhur rigë e erë  
Po qyteti s'u mbush vrer  
Si far' vashe lajkatare

Rri i muzgët në dritare  
Rrugët mbushen me poterë  
Stinë trillesh ti o verë  
Di të therësh me thikare

N'kryq vetmie të gozhduar  
Pre më bëre të kujtimit  
Të njëmuzgu të muzguar

Jap e marr tash me rininë  
Në album të përmallimit  
Loti fsheh fotografinë

PLANETË TË LARGËT  
Përgjatë shpirtit tonë shtrihen  
Këneta hënore  
Dhe Oqeane Stuhish

Për t'i vënë re  
S'ndihmojnë kurrfarë planetografish

Po një ndarje e përjetshme  
I bën të dukshme ato humnera  
Në planetët e largët në ne  
Kur na braktis shpresa

## ETHET E KUJTIMEVE

Shëtitorja u kërrus  
E mbahet si për bastun  
Për trungjet tullace të brirëve

Gjethet me verdhëz  
Ia mbulojnë kurrizin  
Që therje reumatike ndjen

Derisa bëj shëtitjen e mbrëmjes  
Sa s'ia plas vajit  
Për verën e dashurisë së vdekur

Ndalem në mes të shëtitores  
Si për t'i mbledhur kujtimet  
Nëpër plasat e asfaltit

Më mirë po t'i varim si kartëmortale  
Se kështu na i shpiejnë në pleh  
Fshisaxhinjtë

## DRITARJA

Është sy

Të nxjerr nga thonjtë e mureve

Po dhe të bën sylesh

Prandaj ti mos rri

Kohë të gjatë përpara saj

As në festa as në zi

## SHPRESE NË FACULETË

Në të njëjtën kthesë të bulevardit  
Rri verë e dimër pranverë e vjeshtë  
Të njëjtin refren çamçakëz mbllaçit  
Në prehër e mban të njëjtën faculetë

Në lustrën e kohës gravure e gjallë  
Fytyrë-thëngjill e syzgurdulluar  
Gjimnastikën e përsosur të përuljes bën  
Përpara hundës së botës së verbuar

Si një aktor e di krejt përmendsh  
Tekstin e rolit që luan në jetë  
Di ta shumëztoj mëshirën e huaj  
E ta pjesëtojë dhembjen e vet

Në të njëjtën kthesë të bulevardit  
Që nga mëngjesi e derisa bie terri  
Faculeta ia zë gjithë atë shpresë  
Siç e zë ekrani një film tmerri

## LLAHTARIA

Shëtitorja e mbuluar gjethe blirësh  
Fara kungujsh buleta kinemash gëzhoja gështenjash  
Nuk zhurmërin si rëndom në këtë orë të mbrëmjes

Po unë me një mikun tim regjisor  
Shëtisim që nga Theatri e deri te Hotel Grandi  
Nëpër fyryfyçkë këmbë pas këmbë mes blirëve  
Bëjmë biseda të rëndomta për të shkuarën për  
ardhmërinë

Dhe s'di hiq se si e nxjerr ai fjalën te armatimi  
bërthamor  
Duke qëruar fara të kriposura kungulli e duke pështyrë  
Duke qeshur nganjëherë me zë të lartë e duke sharë

Ndërsa mua më bëhet se merr flakë vetë qielli  
Se zbret mbi ndërtesat blirët shëtitësit e mërdhirë  
Që zënë të përpëliten nga llahtaria  
E miku vazhdon ta ndrydhë butonin e fjalëve  
Që si bomba eksplodojnë në përfytyrimin tim  
Sa s'shkrihet së qeshuri kur e lus të ndërrojë bisedë

Kur e lë mes shëtitores e ik për në banesë  
Ku posa hyj brenda  
Redaktori në TV po atë temë paralajmëron në krye të  
ditarit

Ai veçse s'qëron fara s'qesh s'pështyn s'shan  
Mirëpo arrëzën e fytit e shtyp me gisht  
Kratatën shumëngjyrëshe e çliron spontanisht  
E unë përpiqem ta shkul përfytyrimin llahtar



Që si etiketë mbi shishe në tru ma ngjiti miku  
Derisa në ekran emetohet shpërthimi në Nevadë

## STADIUMI

Kur i hapëm themelet  
Shtangëm nga habia

U ngjitëm në Dragodan  
T'na hipi në kokë një marrëzi

Gooooool brohorisnim përnjëherë  
Dhe kapelat i hidhnim për qiell

Shpirti ashtu na lehtësohej  
Për token që nga hekuri do të rëndohej

Më rrëfen një pensionist  
E qesh rëndë e bën me gisht

E di thotë se po të bëhem cergë  
Veçse po të më pyesnin mua

Emrat tanë do t'i shënoja në ulëse  
Në vend të numrave

KUJTIM

I PALEXUESHËM

Në një mbrëmje si kjo  
Shëtitësit do të ndalen për një çast  
Para trungjeve të blirëve

Do të tund ndonjëri kokën  
Duke nxjerrë nga xhepi një cigare  
Po mbrëmë ja këtu e pashë  
Do të bëjë tjetri me dorë

Pastaj do të nxitojnë  
Të arrijnë atje tek i presin  
Duke shkelur pikëllimin e çastit  
Si gjethet e rëna

Dikur dikush do ta shkulë kartëmortalen  
Për të shënuar një numër telefoni  
Apo shiu vetë do ta bëjë të palexueshëm  
Kujtimin

## ARTI I KRIJIMIT

Në letër i nxjerr  
Mendimet që më tundin  
Si trollin tërmetet

Titullin që më parë ua di  
Në vesh sekush ma dikton

Po pa një pa dy ai merr zjarr  
Shkronjat si zhavor  
Për fytyrë m'i përplas

Vija e drejtë që e mban  
Si gjarpër zë e përdridhet  
Kaligrafinë e frymëzimit  
Në zemër ma kafshon

Nga zëra të njohur të largët  
Dora në ajër më shtanget  
Aniqë letra e bardhë ma tërheq  
Si metalin një copë magnet

Dhe s'di ç'të hedh më parë në letër  
Me ç'fjalë me ç'ritëm  
Në ç'metër

E taketukja mbushet shpuzë e mbushen  
Mushkëritë tym e nikotinë  
Dhe ngryset natë dhe çel dita  
Në betejën time me afazinë

Edhe kur s'e shkruaj një fjalë  
Letrën nuk e gris

Se titulli do të më ndiqte  
Fjalët e pashkruara mendimet e pathëna  
Do të krijonin pas meje ortiqe

### DRITHËRIMA

Lampa me tytë përmbi letër  
Nga ritmet e dorës drithërin

E drithërijnë zogjtë e tapicerive  
Lulet e perdeve të mëndafshta

Fiku me gjithë vazë drithërin  
Drithërin piktura me kornizë

Nëpër hapësirën e dhomës drithërijnë  
Trupi dhe gjymtyrët e mia

Nëpër këtë bulërimë drithërimash  
Merr formë poezia

## **KURS PËR PANTOMIMË**

## PALIMPSEST

Orakulli i Dodonës Taksa Ilirike  
Zjarret e Pal Emilit Itinerari i Antoninit  
Mbushin sterën e orëve  
Me ujëra të turbullt të shekujve

Si më mbiu nga zonë e muzgët në ndërgjegje  
I krijuar nga copëza të shuara meteorësh  
Poeti anonim  
Që krijonte vargje në Pallatin Mbretëror

Dhoma u shndërrua në shkëmb  
Ku përplasen valet e bardha të Adriatikut  
Dhe ora e murit në ninëz  
Ku derdhen si rërë format e hënës

Kur i thashë hirësisë me zë të prerë  
Që premiera s'mund të shtyhej për një betejë  
Se vargjet më mirë nga shpatat  
Dinë ta mbrojnë Ilirinë  
Atij i kërceu zemërimi mbretëror

Oh ç'tmerr kur ta nxjerrin me thikë  
Dritën e fundit nga bebëzat  
Peizazhin e atdheut të larë në gjak

Edhe me tërë atë dhembje  
Unë i thashë përmendësh të 40 mijë vargjet  
E Iliriadës  
Po ato si trumcakë të trembur e të mpirë  
U shpërndanë nëpër muzg  
U fundosën bashkë me shpirtin

Vetëm atje ju mbetet t'i kërkon  
Se zjarret përmbi i bënë shkrumb e hi

Nuk di sa herë ndërrojnë format e hënës  
Derisa ato copëza meteorësh  
Më lënë të kthehem në kohën time  
Në këtë antiantikë klinike  
Ku nata e acartë e janarit është gëzof i ngrohtë  
Po edhe këto vargje të shkruara vonë vonë  
Unë i nxjerr në letër ai m'i dikton



## MBROJTËSIT E ILIRISË

Ç'gjarpërinj

Dalin kështu nga ndërgjegja e shekujve

Si nga plasa shkëmbinjsh

Dhe lëvizin në forma spirale në forma valore

Nëpër ajër nëpër mure perde

Nën tavolinë

Pranë këmbëve të mia akull

Derisa rikrijoi vargjet për Ilirinë

Hutimi ndez reflektorët e vet

Edhe majën e lapsit

Në thimth ma shndërron

Dhe hapësirën e tërë në një rrotullimë

Janë kadmi dhe Harmonia

Me ndonjë enigmë të re

Në pleqërinë e tyre të thellë

Dhe vetë Ai që Illit ia dhuroi fuqinë

Janë dhe bijtë e harruar

Nga nekropolat e Hollmit Dimalit Prishtinës

Nga kiçët e anijeve labeate

Nga shkopi i Eskulapit

Monedha e Hvarit

Vijnë si mbrojtës të vatrës

Kësaj hapësire të prerë

Vijnë si kasnecë të një tjetër ndëshkimi

Për dvarjen tone

Apo si shenja

Se do mbështillemi me fuqi të re  
Në vorbull të këtij pësimi

Maja e lapsit nxjerr zëra fjalë  
Që e bëjnë thërmia afazinë  
Dhe gjarpërinjtë zënë të kthehen  
Në hapësirat e ngurosurat të shekujve  
Ku ata e shenjojnë humbjen  
Ilirinë

## OKTAVIANA

Ndërron forma si plastmasë  
Kur e ndrydh e shtrydh ndërgjegja  
Oktaviana

Nga bodrumet e errëta i çelen kaverna  
Pamjet e grave dalmate  
Tek hidhen me fëmijët ngryk në flakë  
Nëpër shkallare  
Mollokë të përgjakur rrokullisen  
Koka të prera me shpatë

Karnel Scipion Nazika, Tiberi  
Dhe vetë Oktaviani  
Në kulmin që hepohet pozojnë  
Si terminatorë të shprogramuar

Thonjtë e gjakosur u prekin në re  
Thonjtë që ia kanë ngulur në fyt  
Si deles Delminiumit

Amulet i krimit në emër të qytetërimit  
Është Oktaviana  
Që ndërron forma si plastmasë  
Kur e ndrydh dhe shtrydh ndërgjegja  
Mermerin e saj

## GEMMA AUGUSTEA

Si s'ke një grimë turp  
Nga ajo kapardisje August  
Që si lakmus ta zbulon mizorinë

Po bëri e u rebelua Bato  
Copë e grimë e bën atë skulpturë  
E bëhesh gazi i botës  
Në sy të spektatorëve  
Në Museum Naturhistorischen  
Në Vjenë

NË ADRENICË

Një qen i zgjebosur

Që mezi merr frymë me gjuhë jashtë në hije

Dhe një burrë i trembur

Me gurin përkresë

Bëjnë roje në atë portë

Ky do të jetë ai luftëtari ilir

Që ka këmbyer gjarpërin me një qen

Dhe zoti e ka ndëshkuar

Mizat s'e lënë të qetë a ndërgjegja

Shihe si dromcohet

Si të ishte i tëri argjilor

Brenda na pret Konstantin Shpataraku

Dhe ora me mozaikë të mermertë

Ku koha është paralizuar

## FORMA TË REVE

Përse me emra kaq të paarritshëm  
Si format e reve në një qiell  
Që s'paralajmëron asgjë  
Molosë taulantë penestë  
Enkelejë pirustë liburnë dasaretë  
Albanë dardanë breukë dalmatë  
E të tjerë emra që shprishen pambarim  
Në një zonë të shurdhër harrimi

Mos ishte një ndëshkim perëndie  
Apo gënjyet veten se bëhemi më të lirë  
Të ndarë me qindra emra e kufinj  
E jo të bashkuar me një të vetëm  
I lir

## NË BUTRINT

Si t'i kuptoj këta gurë  
Këta memecë madhështorë  
Që as përpjekje bëjnë të dëftojnë  
Kush ishte këtu spektatorë  
Tragjeditë kush i deklamonte  
Shi a binte si sot  
Para dy mijë vjetësh  
Cili burrë matej me Hektorin  
Po s'hyri në mbretërinë e shkronjave  
Të vetmit kenotaf të përjetshëm

Nardi sa s'e humb drejtpeshimin  
Ti në të vërtetë je Glauku kur i them  
Ai aktor që e dinte përmendësh  
Iliriadën

Në përumbjen time amfiteatri tkurret  
Si iriq si kërmill si breshkë  
Dhe unë ulem në një gur  
Të lagem deri në palcë  
Mos nxjerr vuajtja gjë nga enigma

Selvitë ma përkundin hutimin  
A për mua vjatojnë  
Që s'i kuptoj këta gurë  
Që s'shndërrohen në shkronja  
Në fjalë

## NË PLAZHIN E DIKTATORIT NË VLORË

A mund t'ia kthjellonte mendimet  
Që i nxinin si radiografi tumori  
Ky ujë kristalor

Po këta miliona guralecë  
Tek shkelte mbi ta gjithë zemërim  
A e ndienin veten simahorë

Karaburuni a e ulte kreshtën  
Kur e qëllonin citate emra të huaj  
Si breshëri me automatik

E ruajmë plazhin po si mos ta ruajmë  
Thotë një ushtar e buzëqesh  
E ruajmë nga shpirti i tij i lig



Ç'ËSHTË ATDHEU

Atdheut hija ime

Nuk është lehtë t'i thuash lamtumirë

Çfarëdo që ta kesh

Në secilin hap që ta lësh prapa

Ai shformësohet si një ëndërr

Po ç'është atdheu hija ime

Që fërgëllon kaq e zemëruar

Dhe ekuilibrin ma prish

Duke më shndërruar në plastmasë

Apo vetëm mirazhet mjegullore

Të hapësirave ilire

Që janë strukur nëpër kronika

Si fatzinjtë në kullat e ngujimit

Të qyteteve të bëra shkrumb nga Pal Emili

Të kështjellave të rrënuara

Që sikur u bëhen bastunë

Tradhtive ideologjive hemorragjive

Bëkan kuptimin e atdheut

Hija ime

Që fërgëllon krejt e tërbuar

Po pse po më braktis dhe ti mua

## A KËSHTU TË ZËKA MALIKIMI

Nga këto pamje halucinante

Sytë sa s'më pëlcasin

As syzat e Reja Çarlsit

S'do të mund të më ndihmonin

Që t'u shpëtoja thikave të helmuara

Të këtyre mbishkrimeve

Nogdaunëve të këtyre kumbonareve

Që më shkaktojnë amnezi

Grisë së këtyre fasadave

Që m'i ngre flokët përpyetë

Tek ngërdheshet si robot i rebeluar

E dinë se jam krejt i huaj

Dhe m'i ngulin gjilpërat e frikës

Në retina

Që t'i ndjekin si kusarë

Peizazhet e atdheut

Të plaçin sytë mos

Më thoshte nëna kur u nisa

Dhe gërvishte fytyrën e vet

Si pelidat në Dodonë

Kur fatthënën në fluturimet e pëllumbave

Parashikonin

A kështu të zëka mallkimi

Oh nënë

## NATA E HUAJ

Më mirë po e lë dritën ndezur  
Se errësira që përgjon si kusar  
Prodhon dorëza të zeza  
Që me një shtrëngim gjakun ta nxjerrin  
Për gojë  
Nofulla të deformuara  
Që kafshojnë si hienat  
Më mirë po e lë ndezur dritën  
Dhe derisa të më zërë një kllapi  
Po mendoj diçka optimiste  
Për atdheun tim që si një copëndërr  
Më shformësohet në kujtesë

Ndoshta kështu e shporr nga vetja  
Këtë Natë të Valpurgës

## NJË MËNGJES I ZAKONSHËM

Zogjë e murrmë të tapicerisë  
M'u futën me dhunë në retina  
Edhe këtë mëngjes

Kot mbyll sytë me shuplaka  
Ata vazhdojnë të rimarrin forma  
Të bëjnë fole në kujtesë

Ndez tranzistorin  
Fëmijë shqiptarë nga Bazeli  
Me një shqipe të çalë recitojnë vargje  
Për shqiptarët jashtë atdheut

Dhe si zogj të trembur tapicerie  
Më rimarrin forma në lotë

Akulli paskësh mbërthyer xhamet  
Figura të mistershme pritkan deshifrimin  
Edhe këtë mëngjes

Të ngrihem apo të rri shtrirë  
Ta dija Kasandra e akullt ç'parathot  
O Zot

## NDRYSHK NË FJALË

Formoj numrin 999026153160  
Dhe nëpër mendje më fluturojnë  
Vijat e bardha të asfalteve  
Peizazhet e verdha të Edrenesë  
Ura gojëhapur e Gallates  
Derisa nga receptorin Hikmeti  
Atje në Arifi të Anadollit  
Hikmet Zeqir Çarkani  
I Zeqir Tahir Gjakes

Po pastaj më erret dhoma  
Derisa ai flet  
Ngase fjalët vijnë gjithë gërvima  
Si të kishin zënë ndryshk në rrënjë  
Si t'i kishin varrosur lidhëzat  
Në atë moçalishtë të uritur  
Dhe zë e më mungon ajri  
Për atë ndryshkë në fjalë që ntrashet atje  
Si në Kalabri si në More

## PËRRALLA PËR UDHËN QË S'KTHEN

A thua janë pjekur tashmë ullinjtë

Në Arifi

A pikin vetiu nga rrembat

E rrokullisen kodrinës

Deri në liqen

A thua shëtit ende Ali Gjakja

Tërë ditën e lume nëpër ullishtë

Duke kërkuar shëmbëllesa

Me fytyrën mjegullore të atdheut

Që e la e më s'e pa

Mos janë kalbur tashmë ullinjtë

E mbetur veç bërthamat

Dhe Ali Gjakja vetë rrokulliste kodrinës

T'i lajë sytë në liqen

Që t'i kujtohet më e plotë

Përralla për Udhën që s'kthen

## KURS PËR PANTOMIMË

Me pamjen e një kuçedre që ka dalur nga përralla e frikshme, arrin Akropolisi në Fushë-Kosovë. Ia bashkangjesin dy vagonë të klasit të dytë në dritaret e të cilëve, në gjuhë të huaj, shkruan mos u kacavar jashtë. Platoja e stacionit kërruset si njeri me spondilozë nga dhembjet e ndarjeve. Ata përshëndesin nga dritaret deri sa u humb sysh stacioni, pastaj ulen dhe pinë duhan e nëpër shtëllungat e tymit vjedhin me sy njëritjetrin. Secili është behaviorist më vetë. Akropolisi e di stacionin e vet të fundit prandaj ata ia kanë lakmi.

Dikur vonë i mashtrojnë gjumi. As e ndiejnë kundërmimin e rëndë të çorapëve, as rënkimin e binarëve ngase lodhja ua shtron një çilim përplot ëndrra që ndërrojnë orë e çast si peizazhet e tokës së huaj. Futen nëpër ëndrra belbëzimet e fëmijëve, shikimet plot mall të grave, lutjet e nënave, shtëpitë e vendlindjes, zhurmërimat e stacioneve, pamjet e qyteteve të ardhshëm, gishtat tregues të pronarëve, barrakat e punëtorëve, veturat luksoze, reklamat marramendëse, shtëpitë publike... Rrotullohen nga njëri krah në tjetrin duke fërkuar qafën a dorën e mpirë dhe vazhdojnë të përplasen nëpër hapësirat e gjymtuara të ëndrrave deri sa të vijë zbardhëllimi i ditës së re kur shohin mbishkrimin: “und hier haben sin den termindienst Auf einen blick...” dhe reproduksionet e freskave që thuase janë shkruar me alfabetin e vetë tjetërsimit.

Ditët shkojnë të ngarkuara me peshën e mërzisë mu si vagonët e klasit të dytë e shtrojnë kalldrëme të gurta moshe e vuajtjeje. Mbrëmjeve ulen e shkruajnë letra

po gjumi i zë mbi toç u mungojnë fjalët për ta shprehur mallin e dhembjenç më kot ndrydhnin tamthat të krijojnë një figurë me pamje atdheuç janë kryeneçe fjalët dhe mendimi zbehet si fotografi e vjetër në tavolinë. Dalëngadalë shndërrohen në pantomistë. Mallin e dhembjen s'kanë si ta shprehin ndryshe vetëm duke valvitur a grisur valutën e fortë në mes të sheshit.



NDARJA NË QAFËTHANË  
Brymë pikëllime  
Zuri t'i mbulonte fjalët  
Sapo drodhëm udhën për Qafëthanë

Ai peizazh në muzg  
Ftohtësi klinike kishte

Vijat e bardha të asfaltit  
Dhe gurët kilometrikë  
Lëviznin si gjymtyrë me frakturë

Dhe pastaj  
Gishti tregues i policit  
Shikimi i hekurt i doganierit  
E ndarja pa asnjë fjalë

Duart tona të mpira  
Nëpër muzg krionin hartën e saj

Hapat më të rëndë se gurët e kufirit  
Dëftonin  
Sa e ngushtë është kjo Qafë  
Që atdheun na e ndan  
A do të pëlcasë një ditë nga pikëllimi  
Ilirian

## DREKË POLICËSH SERBË TE URA E FSHEJTË

Peshqit notojnë nëpër yndyrë  
Pirunët e tyre i ndjekin  
Nëpër thellësitë e pjatancave

Njëri nga policët ia drejton automatikun  
Këmbës së majtë të urës  
Atje dy fëmijë luajnë me rërë

Tre policët tjerë zgërdhihen  
Hedhin bast cakrojnë gotat

Ura e Fshejtë dridhet nga frika  
Në sytë e njerëzve

Rafalet mund t'i qëllojnë edhe fëmijët  
E lëre më legjendën

## MURI I BERLINIT

Këtu ishte halucinant ai Mur  
Që ndante dy botëra  
Një popull  
Thotë Ahmeti  
Dhe tund në ajër  
Pasaportën e emigrantit politik

Aty përbri shkruan  
Den Opfern der Geëalt  
Dhe emra të të vvarëve  
Si kufoma të ngrira në një morg  
Udo Dullick 5 tetor 1961  
Vinfried Frendberg mars 1986  
Që kishte provuar ta kalonte Murin  
Me balon të ajrit

Tash një cope Mur  
E mbështjellë me porcelan  
Shitet pesë marka  
Ndërsa gurvarret e mermerta  
Notojnë turbull nëpër kujtesë

## SYRI NË ZARFË TË VULOSUR

A e njihni Hasan Qorrin  
Me atë shall të bardhë mbi sy  
Tash dyzet e pesë vjet  
Atë burrë që flet vetmevete  
Merr në thua nëpër gurë  
Që kur ulet ndanë udhe  
Me gishtin tregues vizaton hartën  
Nga Nyrnbergu deri në Breznicë

Njëri sy më mbeti atje thotë  
Edhe tash më bëhet se më kërkon  
Nëpër tymnajën e krematoriumit

Për shpirt të shokëve  
Nuk më dhimbset

Po ai do të më gjejë një ditë  
Do të më vijë në një zarfë të vulosur  
Në vend të pensionit

## MUNGESA E LIRISË

I bërë dhe më sterrë nga retë  
Që tërë kohën s'e ndalin vajtimin  
Qytetin e pushtoi veladoni i zi  
I këtij muzgu klinik

U shormësuan shtëpitë blirët  
Siç shformësohen vizatimet në rërë  
Kur mbi to shkilet me zemërim  
Fragmentet e tyre si lakuriqë rendin  
Nëpër retina

I ngujuar në dhomë  
Si dhjetëra herë nga orët policore  
Ndjej marramendjen e këtij shormësimi  
Dhe prekjet e hekurta të vetmisë

Telefoni s'cingëron  
Ai të paktën të ndjehej i gjallë në shtëpi

Miqtë më kanë harruar  
Emrin nga notesat ma kanë fshirë  
Si një fjalë të shkruar në tabelë gabimisht  
Apo edhe ata kështu të ngujuar  
Ndiejnë puslin e çrregullt të shformësimit

Ky muzg klinik po e bën më të plotë  
Mungesën e lirisë  
Që aq shumë përpiqemi t'ia fshehim vetes

## SPONDILOZË

Më shumë se nga mosha, blirët e kryeqytetit janë kërrusur nga spondiloza e dhembjes. U kemi ngarkuar një barrë tepër të rëndë, kartëmortale të panumërta. Kur ndalem para tyre për të mësuar emrat e të ndjerëve, sikur më thonë: këtë dhembje më lehtë mund ta duroni ju njerëzit, ne jemi më të ndjeshëm. Më therin në shpirt blirët e kryeqytetit. Druaj se do të kërrusen edhe më e do të bien pa shpirt në asfalt. Ku do t'i vëmë kartëmortalet pastaj? Ku do ta ekspozojmë vdekjen?

## LIMANI LIMON

Libraria e vockël, me dritare të hapura, thuase u druan shikimeve mospërfillëse të kalimtarëve. Merr frymë si një astmatik libraria. Homeri është aty dhe s'leviz mesa një mumie. Ai apo të tjerët janë të verbër? Barleti duket i dëshpëruar që nuk ia përfillin dëshmitë. Dante, i dënuar në mungesë, për të satën herë sheh ferrin në dritë të diellit. Ndiej pikëllimin e tyre si puslin e shpejtuar. Pluhuri i ka bërë të ashpra, si ndjenjat tona, kopertinat. Xha Limani kruan kokën dhe hesht. Xha Limani i bërë limon.

## I MBËRTHYER NË KORNIZË

Ditën e tetë të urisë  
I gozhduar për një shtrat fushor  
Që pehatet si urë në ëndërr  
Nga kati i shtatë i ngujuar  
Shikoj për dritare

Kodra e Diellit  
Në malet e Gërmisë si samar breshke  
Dhe retë e bardha përmbi  
Më noton nëpër begëza  
Si një pikturë naëve e sapo përfunduar

Motra ma sjell një aspirinë  
Dhe më këshillon  
T'i ruaj sytë nga drita  
Edhe fytyra e saj  
Me atë buzëqeshje të fshehtë  
Në një pikturë renesanse më përngjet

Mbyll sytë ta vazhdoj kllapinë  
Dhe ndiej se si ngadalë  
Shndërrohem i tëri në portret  
I mbërthyer për vdekje në kornizë



## NATYRË E VDEKUR

Një ngjyrë e amullt  
Pëlhurë në sy

Harta topografike  
Tkurret në mes thonjve  
Me shekuj të paprerë  
Të përgjakur

Një bisht sopate  
Dhe një kishëz  
Për ta theksuar krenarinë

Vetëm nuansat zbehen  
Po ç'janë nuansat  
Për këtë Natyrë të Vdekur

VEREMI

Veremosem

Nga ajo gjakftohtësi

Leksikografësh

Përse s'e hoqën

Nga fjalori të paktën

Atë fjalë

## VDEKJA VJEN VETËM

Kur vdekja si çukapik çukatë  
Dhe krijon zgavrat e zeza  
Të dhembjes tënde kozmike  
Të duhet hapi i elefantit  
Të nisesh kalli vetëm  
Të dalësh jashtë hapësirës që të rrethon  
Sepse kërthiza të ka ndarë  
Nga të tjerët përgjithnjë

Nëse mbahesh për litarin e vërtetë  
Do të vezullosh  
Si një copë fildish  
Në xhunglën e kujtimit  
Të kësaj bote

Ndërsa lulja e shpëtimit  
A të mbinë për përjetësinë  
Varet nga vetë vepra jote

## KËNGA E GJELIT

Është afazi që paralajmëron vdekjen  
E ëndrrave  
Mundësinë e thikës në lafshë  
Gjakun e zi në borë

Është fërgëllimë që tund mjegullat  
E kujtimeve  
Perdet e mistershme të gravitacionit  
Hijen e përbaltur të kasnecit gjuhëprerë

Është vetëtimë që ndriçon greminën  
Kozmike  
Burimin e fshehtë të jetës  
Ku luajmë fugimthi me veten

## **DALJA E ATDHEUT EDHE NGA ËNDRAT**

## VAJTIM KOMBËTAR

Në këtë rrafshnaltë dardane  
Ku farë na mbolle me dorën tënde  
Të përjetshme  
Dhe na stolise dritë e dëshira  
Fryn erë asgjësuese o Zot

Kërcëllimë e saj na tmerron  
Shkulim flokët nga dëshpërimi  
Me shpirtin e lagaterrshëm në ankth  
Ngrihemi e ngrysemi

Po edhe me këtë akullsi në palcë  
Ne presim çastin kur fytyra jote e ndritshme  
Do të na e dëftojë ylberin e lirisë  
Atë vezullim që ishte filli i ngjizjes sonë

## RRËFIM KOMBËTAR

Ishte e gjitha tokë e shenjtë o Zot  
Na e dhurove në ag të Zanafillës  
Si një amulet të çmuar ta ruajmë  
Për shpirtin tonë e madhërimin Tënd

Kupën qiellore që e kishim kësulë  
Ekuilibrin që e kishim dhuratë  
I humbëm në lojën fugimthi  
Në zonën e muzgët të tradhtisë

Tash na duhet ta rikrijojmë o Zot  
Fytyrën e plotë të atdheut  
Si portretin në një gravure të thyer  
Ta zbulojmë bashkë me ndihmën Tënde  
Në gjithkahnajën tonë të shpirtit

## KËNGË RIATDHESIMI

Marrin udhët djemtë natën  
Nëpër hone cytanike eksodi  
Në çdo hap shkelin mbi mandatën  
Dridhen ata dhe dridhet globi

Ua ndjellin kthimin nënat  
Duke u hedhur ujë thëngjijve  
Ikin të premtet e të hënat  
Me kujet e kulmeve të shtëpive

Po ata një ditë do të kthehen  
Të dëshëruar e me shpirtin plot  
Mall e dashuri këtu të prehen  
Ndihi në këtë rrugë o Zot



## BATO DESIDIATI

Shën Helenën tuaj për të cilën vajtoni  
E kam jetuar në Ravenë  
Në shkëmbinjtë e saj funebër  
Tiberi s' ma kurseu jetën nga mëshira  
Po nga urrejtja më e egër

Ditët në ravenë ishin mileniume  
Netët ankthe që bymeheshin pambarim  
Sodisja si Ikari humnerat e qiellit  
Po shpirti si pus i thellë  
Shteronte në kotësi e trishtim

Tiberi po ma vriste lavdinë ngadalë  
Me arsenin e tmerrshëm të harrimit  
Më zbardheshin flokët më lëbyreshin sytë  
Iliria po më shfytyronte në trurin e saj  
Të shtrydhur nga dorë e krimit

Ajo i ndjeu e para tinëzitë e Shën Helenës  
Në shkëmbinjtë funebër të Ravenës

PO AJO NATË PA HANË

Me zë të tejkohshëm  
Klithmëprerë më thotë  
Një natë pa hanë

Na bënë rresht për një  
E na thanë  
Ju s'jeni dardanë

Na vunë në trekëmbësh  
E na thanë  
Ju s'jeni albanë

Na groposën thellë  
E thanë  
Këtë fare as dheu s'e mban

Një zë i tejkohshëm  
Klithmëprerë më thotë  
Një natë pa hanë

Natë që m'i mbulon shekujt  
Anëmbanë

KOHA AH KOHA

Një lopë e larme kullot me ëndje  
Aq i bën për arenën  
Me mozaikë të mermertë  
Shtatë pash nën këmbët e saj  
Për vizitorët që fotografohen  
Duke matur me sy perimetrin e qytetit  
Pa kuptuar kurrgjë

Nga kthinat e errëta s'dalin luanët  
As gladiatorët e tmerruar  
Po fëmijë të maskuar  
Që luajnë kukamshefthi

Minush Jero shtangur si statujë  
Më duket se thinjet në çast  
Nga oksidimi i heshtjes

Koha ah koha  
Mos është vetë kjo këmbanë  
Që tringëllin në qafën e kësaj lope të bardhë

## MESDITË NË GËZHOJË

A mund të vdesë sot në vend timin  
Kjo mesditë e përcëlluar  
Si gështenjë e çarë në mes  
Në këtë qytet të kërrusur si urë  
Të mos merr frymë të mos lëvizë gjymtyrët  
Si e vdekur të shtiret  
Ndërsa unë  
Të hesht derisa të pëlcas  
Pa e vrarë mendjen  
A i dridhen themelet Shtëpisë së Lidhjes  
Shpirtit a i dridhet Kalaja  
Sharri a është shpatë që pret mes për mes

Po mesdita tapon në gëzhojë  
E lirë si kërmill

Në vend timin vdes tjetër gjë  
Në akrepat e paralizuar  
Për të miliontën herë vdes e rilindet  
Në këtë vend liria

## TËRMET NË NDËRGJEGJE

I thinjur si bashkë reje  
Shkëputur nga vranësirë e tejkohshme  
Pranë meje ulur në gjunjë  
Asturiasi më thotë  
Therje në shpirt është Peleleja  
Po më shumë portat që mbyllen  
Dhe fjalët  
Që s'mund ta shqiptojnë dhimbjen  
E nënës që mëkon fëmijën e vdekur  
Fidani i vrarë në rrugët e Kosovës  
Është po ai fëmija  
I vrarë me paramendim në burgun e  
Guatemalës  
Ai i ndien klithmat  
Si përplasen nëpër dhëmbët e shkëmbinjve  
E thërmohen në shpirt  
Dhe i errësojnë azimutet në ninëza  
Kot mbyllen portat sytë veshët  
Asturiasi më thotë

## NJË CEP QIELLI PËRMBYSET

U err

Djali ende s'u kthye

Hijet e sendeve kërcejnë

E zgërdhihen

Ekrani shtie me breshëri

Një copë qielli përmbysset

Djali ende s'u kthye

Orë policore ankthi u err

## GJYMTYRË ME FRAKTURË

Zgjimi në orën 2,55 për shembull  
Është më i tmerrshëm nga një sulm epileptik  
Nëpër binarët e ngatërruar të trurit  
Dhjetëra vagonë përfytyrimesh përplasen  
Dikush numëron nga dhjeta deri në një kot  
Evropa e Karl fon Tririt fundoset në ujë  
Dorëza të zeza shtrëngojnë qafën e një fëmije  
Një grua në ballkon mbledh rrobat e thara  
O zot ç'grua epshtdjellëse tek zë e zhvishet  
Lakuriq bën me dorë e zgërdhihet  
Ujë i turbullt sulmon urën e drunjtë  
Një varg dridhet nën rrënojat e frymëzimit  
E shformësohet botë e tërë e tij si plastmas  
Në portë trokitjet bëhen shurdhuese në tru  
Krejt jeta përplasat e thyhet si qelq  
Ndërsa akrepat lëvizin me druajtje  
Si gjymtyrë me fraktura në klinikë

Kur pesha e mëkateve në vuajtje  
Shndërrohet

## SHUMËZIMI I FYTYRËS

Për të mos u takuar me pasqyrën  
Rris mjekër e mustaqe

Për të mos u takuar me pasqyrën  
Nuk i laj sytë në mëngjes

Për të mos u takuar me pasqyrën  
Mbaj syze të errëta

Nuk i shoh dot me sy as vitrinat  
Dhe gjithçka tjetër pasqyruese e urrej

Por kjo ikje qyqare nga vetja  
Nuk shërohet si një rrufë e lehtë

Për ta shikuar pa frikë veten drejt në sy  
Duhet besuar Zotin e vërtetë



## FLETËZDITARI

Sot ishte ditë me vapë qyteti  
Si astmatik përpilitej asfalti  
Çahej si pjepër unë shëtisja  
Me duar në xhepa  
Me syza si të Rej Çarlsit në sy ime motër  
Mërdhinte sot nga ethet në klinikë  
Më tha shpirti i paska rrënjët thellë o vëlla  
Shikimi i saj megjulluar si xham  
Nga hukama kobsjellëse  
S'thoshte asgjë më pak se vdekja

## ABSURDI I ARTIT

Holi i stacionit  
Mezi e ruan drejpeshimin  
Nga braktisja e së dielës

Një vajzë me njërin sy të ënjtur  
Me valixhe nën gjunjë me orë të ndalur  
Lexon Kamynë  
Në një ngjizje indiference e trishtimi

Pastruesja ma vërtit fshesën pranë këmbëve  
Me cigare në gojë me jargë që i lëvaren  
Si ngjyrë në një pikturë të qullët

Kush i beson absurdit të artit  
Pshtë dashur të bëj çmos  
Ta pres autobusin këtë të diel  
Dhe syrin e ënjtur të kësaj vajze  
Ta lexoj si metaforë

## I KAM 500 VJET?

O Ajvaz, më duket si i kam 500 vjet, isha duke i thënë në ëndërr dhe po i mbaja nofullat me dorë, sepse më dukej se po më deformoheshin nga një ngashërim i nëndheshëm, kur Teuta më solli telefonin dhe u përpoq të më tregonte se po më kërkonte Ibrahim Berisha. Vajza e Agronit ende po luante me dhe në oborrin e shtëpisë së vjetër, mu aty ku ishte një gardh i lartë dikur. Disa hapa larg kotecit dhe një vije me ujë të ndotur. Unë po e shikoja me habi, ndërsa me Ibrahimin po merreshim vesh të takoheshim në ëmbëltoresh MIMOZA.

Ndoshta vërtet i kam 500 vjet. Kjo matje e kohës, si e bëjmë ne, s'është e thënë të jetë e saktë, mësa është e saktë ajo vijë që ne mendojmë se e ndan realitetin nga ëndrra dhe jetën nga vdekja.

## SHUMËZIMI I VDEKJES

Nesër do të vdes sërish  
Në të njëjtën mënyrë  
Në të njëjtin çast  
Kur dielli si lafshë gjeli e përgjakur  
Do të përpillet pa shpresë  
Ndërmjet kodrës e detit në Tivar  
Sytë do të më ngurosen  
Si mbishkrime tibetiane në gur  
Dhe asgjë s'do të ndryshojë  
Në itineraret e ditëve  
Frika sërish do të afrohet tinëzisht  
Si krokodili nëpër ujë të turbullt  
Përfytyrimeve të mia  
Deri në një çast të vërtetë

## “OJ SHQIPNI MOS THUEJ MBAROVA”

Në ora shtatë të mëngjesit  
Mbështetur për një trung bliri  
Si statujë e përdhunuar  
Përballë platosë së autobusëve  
Rri e vështroj

Ata nisen me radhë në kohë të caktuar  
Për në Malme për në Oslo  
Për në Helsinki  
Të mbushur spic gra e fëmijë  
Që nën ritmet e këngës  
Oj Shqipni mos thuej mbarova  
Përshtëndesin me lot në sy  
Derisa rrotat e autobusëve si gurë mulliri  
Bëjnë rrotullimet e para  
Si gurët që bluajnë kokrra gruri

Statujës i ther në shpirt  
Kjo ikje e përjetshme  
E shndërruar në humnerë  
Nëpër mijëvjeçarë  
Po kjo këngë në ikje  
Ngjizur me lot e me harrim ç’duhet  
Farsë e të qenit shqiptar

## KUR QENI CIATË

Këtë mëngjes edhe Agimi  
Ia ktheu shpinën shtëpisë

Kthesa e fundit e përbiu  
Si akulli që çahet papritur

Nëpër oborrin e shtëpisë  
Ende enden hije  
Babai nëna dhe motra  
Si aktorë në një dramë  
Po hapat e tyre s'ndihen  
Ata shkelin mbi plagë

Vetëm qeni i lidhur në stelë  
Ciatë ciatë ciatë  
Me putra gërvish dheun  
E sikur thotë  
Ç'arsye kam më shumë unë  
Ta ruaj atdheun

## PRAPA MBETET ZBRAZTËSIRA

Si një shtjellë para sysh  
Po më shpërbëhet atdheu

Fëmijë që s'kuptojnë ku i shpiejnë  
Tek i veshin me ngut  
Gra anemike  
Që duan të ikin kudoqoftë  
Nga vetja  
Dhe burra zëçjerrë  
Që dridhen si fotografia në ekran  
Kur antenat i dridh stuhia

Si një shtjellë para sysh  
Po më shpërbëhet shpirti

Prapa mbetet zbraztësira  
Në formë përfytyrimi për pishën  
Që kur përplaset ah kur përplaset  
Bën një përpjekje të ngrihet  
Dhe ashtu e bën absolut  
Kuptimin për vdekjen

## TERAPI ME QUKAPIKË

Ishte një ëndërr me shumë qukapikë

Që çukisnin tak tak tak

Nëpër trungjet e ajrit të rralluar

Njëri bënte ç'bënte e më çukiste në ballë

Tak tak tak miqësisht

Është ora ta pish një tabletë Histazol

Tak tak tak në tru si mbi dru

Në dhe të huaj



## DIMËR NË ZEMËR

Një nënë e shikon diellin  
Në të perënduar  
Se nga ç'zonë e zemrës  
Dhembja si ngjyrë i derdhet  
Në formë të së folmes përçart  
Ku je në këtë çast humneror  
O bir nëna të pastë

Në oborr hije dhe mungesë  
Si një dalmatikë dridhen  
Ndërsa larg në hapësirë  
Një plym kojrilash  
Paralajmërojnë dimrin e gjatë

O Zot

Ç'parathonë këto shigjeta kojrilash  
Për Lanskrunën e largët

## DALJA E ATDHEUT EDHE NGA ËNDRRAT

Më parë kjo ishte vatër  
Ku shtrohej tryeza e kënga  
Ku rriteshin fëmijë  
Thureshin ëndrra

Një Fitore një Ilir një Shpresë  
Dhe një Atdhe i vogël

Ata janë tash diku në Kirunë  
Janë bërë më të brishtë  
Më apatikë  
Dhe në ëndrra u futen me përdhunë  
Shkretëtira të bardha

Atdheun s'ua kujton asgjë më  
Madje as këtë vatër  
Me themele që mbahen  
Mbi emrat e tyre ndër shekuj

## FËMIJA I XHAMTË

Unë lëviz dorën

Ai dorën

Unë shtrëngoj nofullat

Ai nofullat

O zot

Paskësh qenë fëmijë i xhamtë

Po nënës përse i dhimbset

Kaq shumë

## NJË PARALAJMËRIM

Mbi një copëndërr  
Nga shpalosej humnera  
Në një hotel në Berlin  
I kërrusur si pikëpyetje  
E krijuar nga gërryerjet në shkëmb  
M'u shfaq i pikëlluar

Po më shfytyron braktisja  
Ikja jote po më thërrmon  
Si dora barbare një statujë

Dhoma dhe reproduksionet në mure  
Ishin në komë të thellë  
Vetëm perdet tundeshin  
Si kur përvidhet nëpër to dikush  
Që të jep një paralajmërim

## PROFIL

Gjumin ia prishin ëndrra surrealiste  
Gazi lotësjellës i figurave ia zë frymën  
Në udhëkryq e vonojnë njësitë tankiste  
Ku bashkë me urrejtjen përbin pështymën

Në qoshkun e parë blen një krah gazeta  
Gazeta me germa e me gjuhë të huaj  
Dante Aligierit s'i bëri gjë Mesjeta  
Kohë dhe më barbare tha vijnë në shekujt tuaj

Si mbi qelqe të thyera shkel nëpër asfalt  
I molepsur droje dhe përfytyrimesh  
Përmbi kokë ka retë si kërmijn gjigantë  
E në zemër fshehur një tumë frymëzimesh

Vdes nëse s'e vrasin për fjalët e veta  
Dhe i përgjunjet përjetë një gjumi guror  
Në kujtesë të turbullt kombi i balsamohet jeta  
Lulja e shpëtimit mbi varr a i rri kurorë

## Shënime autobiografike

### I. Shkollimi:

Milazim Krasniqi u lind më 25 tetor 1955 në Breznicë, një lokalitet afër Prishtinës.

Shkollën fillore e kreu në vendlindje, ndërsa shkollën e mesme të mjekësisë në Prishtinë.

Studimet për letërsi shqipe i kreu në Universitetin e Prishtinës, ku magjistroi në vitin 1988, me temën “Struktura e vargut të Ndre Mjedjes”. Po në Universitetin e Prishtinës, ka fituar gradën e doktorit të shkencave filologjike me tezën e disertacionit “Soneti në poezinë shqipe” më 15 shtator 2004.

### II. Botimet:

#### Poezi

1982 - Imazhi gri

1885- Pirg vegimi

1987- Qeshje sardonike

1990- Formula e Katonit

1994- Kurs për pantomimë

1996- Dalja e atdheut edhe nga ëndrrat

#### Prozë (romane)

1998- Fijet e shpirtit

2002- Fotografitë e kujtimeve

## Dramaturgi

1990- Zbulimi,  
Mos më merrni në qafë,  
Punë Sizifi  
1996- Kur lindi partia,  
1997- Kush i bie fyellit  
2001- Bryma e vdekjes  
Kosovë në ndërgjegje  
2003- Monedha e Gentit  
2004 Rulet rus për Ali Pashën  
2004 1999 Tragjedi shqiptare (trilogji)  
Bryma e vdekjes( botim i dytë)  
Një Antigonë e re  
Kësulkuqja e shekujve

## Publicistikë

1998- Horrat në krye të detyrës  
2000- Kosova pas 22 janarit 1998

## III. Angazhimi profesional dhe publik

1975-1980: teknik medicinal në Klinikën e Kirurgjisë  
të Fakultetit të Mjekësisë në Prishtinë,  
1981-1986: përkthyes po në këtë klinikë,  
1987-1990: redaktor i revistës për kulturë “Fjala”,  
1988-1999: sekretar i Shoqatës së Shkrimtarëve të  
Kosovës,  
1990-1995: kryeredaktor i revistës “Fjala”,  
1995-1999: redaktor përgjegjës për Kosovë i gazetës  
ditore “Bota Sot”, 1999-2000: kolumnist i gazetës  
“Kosova Sot” dhe “Gazeta e Re”,

2001: kryeredaktor i revistës “Interesi Nacional”,  
2001-2004: anëtar i Bordit të Drejtorëve të  
Radiotelevizionit të Kosovës dhe analist te Radio  
Europa e Lirë,  
2003-2004: bashkëpunëtor për lëndën Sociologjia e  
letërsisë në Fakultetin e Filologjisë në Prishtinë.

Në vitet 1989-2001 ka qenë i angazhuar edhe në  
politikë, po nga marsi i atij viti, është tërhequr  
tërësisht nga jeta politike.

Jeton në Prishtinë.